

PROGRAMMA

²⁷⁰
RECTOR

ACADEMIÆ ROSTOCHIENSIS

BERNHARDUS

Barnstorff

Med. D., Prof. Publ. & Poliater

AD

JUSTITIAM DEI VINDICEM,

quæ ipsi naturalis est,

Circa acerbissimam Passionem

JESU CHRISTI

ipsius FILII DEI, DOMINI

atque Salvatoris nostri

seriò meditandam

Omnes omninò Cives Academicos, eâ quâ fas est

pietatis & officii ratione, peramanter

invitat.



ROSTHOCHII,

Typis JOHANNIS WEPPLINGII, Univ. Typogr.

Passionem JESU CHRISTI ipsius Filii DEI salvatoris nostri, ejusq;
causam animo piè sollicitèq; semper perpendere sicut summæ atq;
necessariæ pietatis est, ita nec sine magnâ animæ salute, voluptate,
atqve omni recreatione solatii res illa unqvam, si seriò quidem
suscipiatur, esse potest. Aperiuntur hîc fontes gratiæ divinæ beneficentissi-
mæ, omni suâ in nos plenitudine redundantes. Elucet inde quâm manife-
stissimè splendor omnis gloriæ divinæ, ut nec misericordiam sine justi-
tia, nec utramq; sine mirabili sapientiæ opere intueri atq; agnoscere liceat
conf. 2. Cor. IV. 6. Nos jam ut eò melius rem omnem intelligamus, de-
positâ longè Bacchanaliorum cogitatione, eò flectamus animum ejusq;
curam, ut ostendamus, redemptionem generis humani aliâ ratione
prorsus fieri non potuisse. Expendamus itaqve nunc DEI justitiam
contra peccatores vindicem eâ quâ licet dignâ meditatione, hoc est
quâm diligentissimè & non sine multa pietatis recordatione. Neque
enim meritum CHRISTI, quod sanguine ipse suo interposuit, ritè
æstimare poteris, neque gloriam DEI adeò apud animum ampliare,
nisi in hac quoque fide confirmatus fueris. Atque ut rem ab initiò ag-
grediar, eam veritatem, quæ est immutabilis naturæ atqve æternæ
æstimationis, satis clarè intelligimus non nisi à DEO vim suam habere
posse, ea quidem ratione, quâ DEUS se ipsum negare planè nequit
2. Tim. II. 13. Sicut enim omnis alia, quæ est rerum veritas, extra
voluntatem DEI neque sui neque rationis ullo principio, unde consti-
tueretur, niti potest, ita neque illa, quæ æternæ veritatis sunt, aliun-
de derivare fas est, quâm ex ipsâ essentiâ DEI, quæ est immutabilis
& æterna. Inde est, quod idem simul esse & non esse omninò ne-
queat. Inde virtutem suam mensuramque accipiunt rationes arith-
meticæ, ut v. g. tria ter repetita atqve ex se multiplicata necessariò fa-
ciant novem. Inde relationes quæque id inferunt, idque sibi volunt,
quod talis rerum ad se invicem respectus postulat, ut v. g. totum refe-
rat partes, Pater filium: Qui conceptus omnes tales sunt, ut qui eos
sive in dubium vellet vocare sive negare, non existimaretur sanæ men-
tis esse; Cumque sic in infinitum abest, ut naturam suam vel ullo modo
variant citra evidentem rationis & voluntatis contradictionem, quam
DEUS nunquam pati potest, manifestum est, has & similes veritates
non à liberâ & indifferenti voluntate DEI esse suspendendas, sed ex
ipsa naturâ e us, quæ neque umbram mutationis ferre sustinet Jacob;
1. 17. profluere. Jam verò qualis veritas est, talis etiam intelligitur esse
justitia, quæ illam sequitur tanquam individua Comes in naturâ per-
fectissima. Neque enim aliter aut velle aut agere oportet, quâm sicut

de rebus agentisqve ad objectum relatione & habitudine judicatum est, adeo ut vel minimus voluntatis motus contrarius imbecillitatem aliquam naturæ jam inferre non sine causa censeatur. Neque veritas & justitia aliud sui discrimen interponere videntur, quàm quod est rationis, ut veritas putetur magis res respicere, justitia magis actionem. Æterna itaqve illa DEI veritas sicut naturæ divinæ sine ulla mutatione inest, tanquam certissima regula omnium morum, ita id etiam habet, ut rectitudo DEI & leges ejus ipso veritatis divinæ nomine quàm gravissimè veniant, æque latè sic patente & veritate & justitiâ illâ æternâ Pl. CXI. 7. CXIX. 30. 86. Quemadmodum ergo intellectum rebus suis, quas intelligit, conformem esse debere, per se in omnem æternitatem certissimum est, ita voluntatem quoque, quæ in certum aliquod objectum fertur, oportere in omnibus ab intellectus judicio suspensam esse, æquissimam pariter ac æterni juris rationem habet. Et insanam velle voluntatem, quæ à rectæ rationis præscripto recedit, aut approbare, aut benignius tolerare, à justitiâ prorsus alienum est. Ita enim conformaretur voluntas voluntati, vel saltem ad affinitatem istam accedere videretur, ut justitiæ amplius rationem sic tueri velle in neutram partem esset integrum. Cum itaqve Creatura eam habeat sui significationem, ut sine cogitatione Creatoris ne nomen quidem animum subire queat, essentiam, motum atque vim omnem à voluntate Creatoris accipiens, efficitur etiam inde jam sponte suâ, ut Creatura obsequium præstare opus habeat Creatori & quovis tempore promptissimum & nonnisi cum plenâ destructione sui terminandum. Hæc, quæ incumbit Creaturæ, justitia non remitti potest unquam, nec ad arbitrium suum fingi, sed necessitatis est omnibus suis numeris absolutæ. Quomodo enim quæso, quod creaturæ nomen habet, quamdiu poterit cogitari, sine ipsius naturæ eversione Creatoris voluntati se subducat? Annon sicut ipsius voluntate fieri cœpit, ita eadem ejus virtute per omnes temporis partes indiget creatura, ut subsistat pariter atque operetur Apoc IV. 11. ? Aut sanè appellationem sui omnem mutet atque amittat Creatura, quod tamen universam rationem planè tollet, aut obediens esto Creatori per quavis temporum intervalla. Quas officii sui partes, ut etiam inter Creaturas essent, qui intelligerent, Angelos atque Homines DEUS condidit ad imaginem sui. Et quantâ facilitate non in intellectum hominis id omnino influit, Creatori esse parendum, hancque obligationem ex ipsâ natura nostrâ profluere, nullo sive facto sive casu mutabilem. Qui contrà sentit atque agit, ita in contrarium abit, ut vim intelligendi planè eversum eat. Non sensus, non

ratio officium ibi amplius suum facere possunt, atque ita contrariis pugnantur, ut neque locus rationi relinquantur, dum quæ necessariò involvuntur conceptu Creaturæ, ita prorsus & perturbantur & auferuntur. Tantum abest à justitia divinâ, ut hanc insaniam æquo animo perferat, ut incendatur potius ad omnem vindictam exercendam. Culpa namque ex tali offensione DEI contrahitur non nisi ipsâ morte æternâ diluenda h. e. infinitæ miseriæ, quam neque animo satis complecti, neque ulla linguæ virtute satis enunciare poteris. Annon DEUS ibi contemptui habetur, ubi ita protervè imperium ejus spernitur? Annon sive alius sive ipse ita peccans in locum DEI substituitur, nullâ sic æterni Creatoris habitâ ratione? Annon excutitur sic omni violentiâ, quantum in se est, imperii illa necessitas, quam ipsa natura Creaturæ imposuit? ita hic cumulantur peccata, ut neque numerum eorum amplius inire perspectum habeas. In infinitum enim excurrunt errores atque crimina, quando ab æterno veritatis principio semel receditur, quocunque alio opinionis idolo sibi in locum ejus efformato Joh. VIII. 44. Si jam DEUS est fons omnis juris, si regula atque æterna veritas, neque de imperio suoque jure vel quicquam eum cedere posse, seriò putandum est. Si enim cederet aut remitteret aliquid, palâm significaretur, veritatis etiam æternæ posse aliquam jacturam fieri, quâ intelligitur, creaturam Creatori absolutè teneri, posse jus illud DEI immutabile in creaturas ex arbitrio tamen DEI aliquantulum mutari, posse etiam imperium DEI impunè negligi, si DEUS modò gratiam facere vellet, remque sic esse æque facilem arbitrii divini & punire & remittere peccatum, atque obedientiam non esse ita juris naturæ, ut absolutæ sit necessitatis. Ita verò actum esset de omni illâ juris ratione, quæ ex ipsâ essentiâ & naturâ obligatorum exturgit, quâ aliter illa neque considerari, neque se habere posse, juxta habitudinem suam ad obligantem simpliciter æstimantur. At verò quantum ab omni ratione abest, ut Creatura unquam permittatur juris sui, legeque divina exsolvatur tanquam non dependens à DEO, eo minus etiam fieri potest, ut quicquam imperio suo decedere Deus patiatur, peccataque homini impunè dimittat. Annon qui imperata Dei facere detrectat, oppidò testatur, se nolle Deum audire seq; velle prorsus suæ potestatis esse, atque ex animi sui libidine agere, quæcunque ageret? Jam si hujus sceleris Deus impunitatem homini daret, annon permetteret sic illi voluntatem aliquando suam, quâ sibi ipsi vivere voluit sine legibus, sine ratione justitiæ? Annon relinqueretur inde, posse tamen hominem obligatione suâ erga Deum aliquando absolvi? Nam cui condonat imperator crimen læsæ Majestatis suæ sine poenis, illi se facilem præbet ad ferenda.

ferendam inobedientiæ voluntatem, conceditque, quod licuerit ita ad-
versari præceptis: Cumque homo semel lapsus in peccatum, reluctandi
illam libidinem per naturam suam continuat, viribus benè agendi pror-
sus jam amissis, sicut qui semel sibi vitam ademit, per se ad vitam resur-
gendi nullam habet amplius virtutem reliquam, sed ad corruptionem
magis propendit, consequeretur multò magis, si DEUS veniam ipsi si-
ne pœnis faceret, hominem etiam genio suo indulgere posse, cum neque
suâ sponte deponat homo malitiam, sed contra naturalem etiam
repugnandi voluntatem divinâ modò superveniente virtute imute-
tur. Interponeretur ergò necessariò tale incredulitatis spatium, ubi
ipsam etiam obligationis suæ erga Deum opinionem ex animo suo eje-
cit homo, quam nisi Deus graviter puniret, vel eâ saltem ratione con-
firmaret, quod non simpliciter aut rationi contradi- ceret, aut naturæ
divinæ repugnaret. Adeò verò tandem omnis sic creaturæ conceptus
periret in ipsâ ratione, ut eam fingeres vel ad tempus aliquod non aliun-
de dependere. Adeò imperium Dei, quantum apud hominem est,
aliquando nullum esset & planè cessaret. Nam cujus autoritas, præ-
teris etiam legibus, apud subditos nihil valet, ille non intelligitur illo tempo-
re imperator esse, quando insuper nihil acerbi, nihil gravius in subditos
decernit, ut ne sensum quidem doloris cujusdam inde illi experiantur.
Quod quàm absurdum sit, omnemque rationis usum planè inutilem
reddat atque confundat, quilibet sanæ mentis facilè deprehendit. Ne-
que enim ex merâ Dei & nostrâ voluntate, quod subinde inculcandum
est, illud officium emergit, ut Deo simus obligati, sicut filius adoptivus
à voluntate Patris & sua, quæ utrinque per se est mutabilis, parendi
suam rationem deducit, sed, ut jam supra variè monstratum est, ex ipsâ
naturæ nostræ conditione parendi illa necessitas simul est enata, parit-
que nobis ætimationem sine ullo restringendi modo absolute continu-
am. Atque hinc etiam est, quod ipsi quoque gentiles τὸ δικαιοῦνα & Ἰὺ
i. e. hanc à justitia divina requisitam pœnarum compensationem per na-
turam suam nosse dicantur Rom. 1. 32. Quomodo verò id ipsis un-
quam licuisset, si justitia hæc DEI vindex esset liberi decreti? Neque
minus Deus inde collaudatur tanquàm à re simul perficiente, quod pœ-
nasumat à malis atque contumaciis, non dissimulans, non parcens
eorum flagitiis Exod. XXXIV. 7. Nah. 1. 2. seq. Tantâ gravitate hæc
ibi dicuntur, ut Deus non perfectus in se amplius crederetur, nisi & vin-
dictæ scelerum penes eum naturalis locus esset. Et sicut justitiam in
se consideratam à DEO separare velle absurdissimum est, ita neque vindi-
ctam, quæ tanquam species justitiæ laudatur 2. Thess. 1. 5. seq., à DEO un-

quam vel animo se jungere oportet. Equidem Reges, Principes atque alii Dynastæ id sibi tribuunt adhuc, atque utile esse nonnunquam arbitrantur, ut injurias subditorum concoquant, vel non adeo animo proponant, neque inexorabiles nimium neque ad vindictam propensi, sed placabiles in omnibus. Verum ita ipsi docent, se esse ejusdem naturæ, quæ ex carne & sanguine constat, cum rebellibus subditis, atque æquæ ad lapsum talem procives, si ita sibi relinquerentur, sicut subditi. Quicquid ergo misericordiæ apud se videntur dare, ex memoriâ communis, quæ est naturæ nostræ, fragilitatis dare præsumuntur, vel quodammodo etiam tenentur. Accedit, quod nullum Principis imperium, inquantam etiam siue terrarum siue juris amplitudinem pateat, ejus sit naturæ, ut ipsi per se debeatur aut mutari prorsus nequeat, cum neque spiritum ex virtute sua trahat Princeps, sed gratiæ divinæ omnia, quæ habet, sicut alii homines, accepta referat necesse est. Quemadmodum ergo incrementum capere possunt res Principis, ita neque sine metu damni unquam eas consistere, experientia rerum subinde testatur. Et licet Princeps per omnem etiam vitam imperii sui administrationem siue ullâ clade felicissimè producat, ita tamen sub finem vitæ suæ ipse tandem frangitur atque minuitur, ut unâ cum vitâ imperium deponere à superiori potestate gravissimè cogatur. Quid inde mirum, non adeo semper urgere Principem atque persequi jus imperiumque suum. quod ex gratiâ alterius ipsi in alios modò contingit, quodque per se ita caducum est. Quoties tamen & quantum de compensatione, quæ fieri per poenas debebat, remittit Princeps in re quidem, quæ ad imperatoriam ipsius dignitatem spectat, toties etiam atque tantum juri imperioque suo aliquid detrahi facile concedit, sicut ille, qui parùm curat res sibi ablatas à fure restitui, contentus in posterum, mente prorsus mutatâ, furem à rapinis abstinere velle. Quid? quod periculum rerum omnium non parum augere videretur Princeps, si militibus in bello quoque adversus se insurgentibus pari semper promptitudine ignoscere vellet. Qui calus sanè per se siue ullâ spe veniæ vindictam exposcere necessariò videtur, ne alii exemplum secuti, dum in eandem sceleris similitudinem prolabuntur, omnem rerum summam si non prorsus subvertant, tamen mirum quantum affligant: Vel si nihilominus in benignam voluntatem adhuc propenderet Princeps, ostenderet potius ita mutationem rerum suarum etiam fieri posse, quàm ut consuleret & sibi & auctoritati suæ & multorum salutem. Verum enim verò longè alia est ratio cum imperio Dei, quod ita summum atque necessarium est, ut nullos gradus agnoscat, neque in majus ampliandum neque ulla parte minuendum. Quò sensu verè ab-

solutum esse dicitur, à legibus nempe alienis, quanquam non ab ipsâ Dei naturâ, quâ se exuere nequit. Atque eâ propinquitate, eâque necessitudine cum Dominio Dei ejusque potestate conjuncta est justitia, quæ est cum irrogatione poenæ, ut alterum ab altero magnificè celebretur Apoc. XVI. 5. 7. c. XIX. 11. sq. Neque est, quod in contrarium velis cogitare, Deum etiam in se esse summè misericordem, cum misericordia non excludat justitiam Dei punientem, neque unquam possit peccatorem ipso facto prius respicere, quam de satisfaciendi modis fuerit prospectû. Ea certè attributorum omnium in Deo est perfectio, ut nunquam Deus possit esse sui dissimilis, sed sibi exactissimè semper conformis in omnibus. Annon in sole vis est æque liquefaciendi atque indurandi, æque illuminandi atque obscurandi hominum oculos, æque fovendi atque comburendi terrarum plantas? Annon tamen inde statim est diversa lux aut radiorum in se contraria dissimilitudo? ita multo minus quæ in Deo sunt naturales perfectiones, à se invicem dissidere possunt, aut altera alteram excludere, licet pro objectorum conditione actiones animadvertantur oppidè contrariæ, & conceptus etiam nobis inde formentur de virtutibus illis agendi prorsus sibi adversantes. Proinde simul ac cogitatur in DEO misericordia hominibus peccatoribus exhibenda, etiam cogitatur de justitiæ satisfactione. Quæ cogitationes ita sibi invicem implicantur atque inhaerent, ut cernantur simul esse atque æque latè patere. Neque enim satisfaciendi ille modus sine misericordiâ, neque misericordia sine illo animo observari unquam possunt aut valere; objectumque misericordiæ tale esse oportet, pro cuius peccatis ut sibi satisfiat, jam DEUS ipse providit. Inde nullam bonitatis, nullam misericordiæ divinæ erga semet cogitationem aut subeunt diaboli, aut ejus rei facultatem habent. Continentur enim sub caliginem vinculis æternis epist. jud. v. 6. Et tamen misericordia est inter illa attributa, quæ ipsi naturæ divinæ per se debentur. Homines contra generalem DEI erga se bonitatem ex tam jucundo Creaturarum conspectu, ex tantâ beneficiorum multitudine colligere atque intueri in promptu habent ubique. Nobis enim ab æterno Deus Salvatorem decrevit, qui poenam in se ipsum derivaret iramque divinam pro nobis infinitis modis placaret. Quod nisi factum esset, pari infelicitate cum diabolis neque bonitatis neque misericordiæ Divinæ ullum sensum perciperemus, clamante potius justitia Dei undique vindictam atque horribiliter terrente. Et si alia Deus via nobiscum in gratiam redire potuisset, quantum non inde minuëretur meritum Christi! Exspiraret sic summa ejus necessitas, quæ auctoritatem ipsi facit maximam. Leviores fierent dolores, dum ipsi Filio DEUS facilè pepercisset ejus amantissimus. Imò eluderetur omnis ejus veritas, quâ abjectissimè
eti-

etiam coram DEO evacuatum esse Christum Majestate divinâ, si usum
& sensum ejus inspectes, docet Scriptura. Ita facile etiam major audacia
atque peccandi libido hominum animis accederet, dum spes veniæ esset
præter sanguinem Christi etiam ex eò, quod ira Deo non esset natura-
lis. Quæ omnia sicut quàm longissimè à rationis sanæque doctrinæ in-
stitutione deflectunt, ita neque locum inveniant apud animum Christi-
anum, ut vel cogitentur vel præceptis tradantur. Relinquitur ergò, ut
gloriam hanc DEO justitiæ vindicis intemeratam semper vindicemus
atque constantissimè. Quantâ non severitate hanc ipse Deus etiam à
FILIO suo exegit? Intueamur modò exemplum hoc justitiæ non sine
magno animi tremore! FILIUS fuit ipse dilectus, qui ita miserrimè
excruciatus: Peccata etiam sunt aliena, non propria, ob quæ tantum
iræ divinæ incendium in Jesum nostrum exarsit. Obstupefcit animus
admiratione tantæ rei, ut tantum non attonitus hæreat, non satis ha-
bens, quid in calamum amplius effundat, cum mysterium hoc infinites
captum humanum excedat. Qui est ipse amor Dei, in quo est omne Patris
beneplacitum, ut nec sine illo sibi ipsi placeat Col. 1.13. Matth. III. 17, ab
eo iam ita DEUS averso fuit animo, ut nullum genus acerbitalis adversus
eum prætermiserit. Qui est ipse virtus DEI 1. Cor. I. 24, ut omnem etiam
virtutem suam Pater in Filio habeat, sicut sol in radiis Joh. XIV. 10.,
illum ita laceravit, ita fregit atque prostravit, ut omnes etiam vires pror-
sus amiserit. Qui est splendor gloriæ divinæ & character personæ Pa-
tris Ebr. I. 3., ut nec Pater intelligatur sine illo gloriosus esse, sicut sol
non lucet sine radiis, illum ita deformavit Pater, ut ne homini quidem
amplius similis fuerit, sputo, sordibus impiorum, & sanguine suo foe-
dissime maculatus. Adeò severiter & gloriosè justitiam suam de-
monstravit DEUS creaturis omnibus, ut non nisi in sanguine ipsius Filii
nobis ad se pateret iterum reditus! *Hunc jam JESUM nostrum propo-
suit DEUS placamentum per fidem in sanguinem ipsius, ut ostenderet
justitiam suam Rom. III. 25.* Agnoscamus ergò, *Cives optimi, à peccatis*
peccata hanc DEI h. e. præcisam admodum & exquisitam justitiæ vindican-
tis rationem, & summam simul ejus benignitatem, eâ quâ fas est timoris
circumspeditione, non amplius peccata in minimis ponentes! Satisfa-
ctum jam est pro nobis infinito sanæ redemptionis pretio, non ut licenti-
am nobis sumeremus eò confidentius peccandi, sed ut viveremus jam in
ejus gloriam, qui pro nobis mortuus est atque resurrexit 2. Cor. V. 15. Illi
jam Patri omnis misericordiæ in sanguine JESU CHRISTI Sal-
vatoris nostri sit gloria, laus & gratiarum actio in æterna
secula Amen! Valet.

P. P. Sub Sigillo Rectoratus A. 1697. d. 14. Februar.